

Mid-Day Dogri News Bulletin, 25th June 2024

समे – 12:25

<><><><><><>

Oath 2nd Day

18मीं लोकसभा दे पैहले पैहले इजलास दे अज्ज दुए रोज नमें चनोए दे सांसदे दे सगंध चुक्कने दा सिलसिला जारी ऐ। कल पैहले रोज प्रधानमंत्री नरेन्द्र मोदी ते उंदे मंत्रिमंडल दे सदस्ये सब्बने शा पैहले सगंध चुक्की ही। जम्मू प्रांत दिएं दऊं लोकसभा सीटें उधमपुर ते जम्मू थमां चुने गोदे डॉ. जितेन्द्र सिंह ते जुगल किशोर शर्मा होरें बी कल सगंध चुक्की। इनें दौनें डोगरी भाषा च शपथ लैती।

<><><><><><>

PM-Emergency

विरोधी घड़े आस्सेआ छेड़ी गेदी लोकतंत्र ते संविधान गी कथित खतरे कोला बचाने दी मुहिम दा तगड़ेयाई कन्ने परता देने लेई प्रधानमंत्री नरेन्द्र मोदी हुंदी अगुवाई च बीजेपी दे सब्बने लीडरें अज्ज 7975 च कांग्रेस दे राज च लाई गेदी इमरजेंसी आले मुद्दे गी अपना थेआर बनाइयै कांग्रेस पर जबानी हमले तेज करी दित्ते न। प्रधानमंत्री होर अपनी इक सोशल मीडिया पोस्ट च लिखेआ ऐ जे इमरजेंसी दी सयाह दिनअसेंगी चेता नोआंदे न जे किस चाल्ली कांग्रेस नै अपनी मनमर्जी चलांदे होई हर खासो आम दी अजादी ते बुनियादी अधिकारें गी खुस्सी लैता हा ते इस चाल्ली उस संविधान गी पैरें हेठ मिंदी दित्ता हा जेहदी हर इक भारतवासी दिलै नै इज्जत करदा ऐ। उनें आखेआ जे अस उनें सब्बने लोकें गी नमन करने आं जिनें इमरजेंसी खलाफ अवाज बुलंद कीती ते लोकतंत्र गी जींदा रखने लेई संघर्ष कीता।

<><><><><><>

CBI-NEET

नीट-यूजी मतेयान च कथित अनियमितताएं दी जांच लेई बिहार, गुजरात ते राजस्थान थमां सीबीआई नै 5 मामले हत्थें च लैते न। अधिकारिं मूजब सीबीआई नै गुजरात ते बिहार थमां इक-इक मामला ते राजस्थान थमां 3 मामले परतियै दर्ज कीते न।

सीबीआई महाराष्ट्र दे लातूर दा इक होर मामला बी हत्थै च लेई सकदी ऐ। अधिकारिणं दा आखना ऐ जे बिहार कथित तौरा पर क्वसचन पेपर लीक मामले च बिहार पुलस नै एफआईआर दर्ज कीती ही। उत्थें गै 4 होर मामले मेदवारें दी जगह कुसै होर आदमी आस्सेआ पेपर देने ते मेदवारें, मकामी अफसरें ते मतेयान केन्द्र पर ड्यूजी करने आलें दे कम्मै च बिघ्न पाने सरबंधी धांधली कन्नै जुड़े दे न। नीट-यूजी दा रिजल्ट 4 जून गी आया हा जेह्दे च 67 बच्चें गी फुल्ल बटा फुल्ल नंबर दित्ते गोदे हे जेह्दे कारण मतेयान च गड़बड़ी दा शक्क पैदा होआ हा।



NEET-Omar/Mufti

नैशनल कांफ्रेंस दे लीडर उमर अब्दुल्ला होरें आखेआ ऐ जे संसद दे इजलास दे पैहले ध्याड़े विरोधी दलें दी नुख्ताचीनी करने दे बजाए प्रधानमंत्री नरेन्द्र मोदी होरें गी नीट पेपर लीक आले मामले पर बोलना लोडचदा हा। अपनी इक सोशल मीडिया पोस्ट च साबका केन्द्री मंत्री होरें आखेआ जे प्रधानमंत्री होरें गी एह गल्ल जचनी ही जेकर ओ देश दे नोजवान बच्चे-बच्चिणं दे होरने च बोलदे, नीट आले मामले च कोई भरोसा दोआंदे जिसी लेइयै लक्खां बच्चें अज्ज परेशान न। उमर अब्दुल्ला होर कल 18मीं लोकसभा दे पैहले इजलास दे पैहले ध्याड़े प्रधानमंत्री हुंदे ब्यान पर अपनी प्रतिक्रिया देआ'रदे हे। तोआई पीडीपी प्रमुख ते सांबा मुख्मन्त्री महबूबा मुफ्ती होरें बी मेद प्रगट कीती ऐ जे सब्बने पार्टिणं दे सांसद गुठबाजी कोला उप्पर उठियै नीट पेपर लीक मामले गी संसद च पुट्टगंन।



Amarnath Prep. Udhampur

औंदी श्री अमरनाथ जी दी यात्रा लेई तैआरिणं दे सिलसिले च कल उधमपुर दिणं जिला विकास कमीशनर सलोनी राय होरें जखैनी थाहर राष्ट्रीय जरनैली शिड़कै कोला लेइयै चनैनी तोड़ी यात्रा दरान गड्डिणं दी बवस्था आले ढंगै सिर आओजाई गी जकीनी बनाने लेई कीते जा'रदे प्रबंधें दा निरीक्षण कीता। डीसी होरें राष्ट्रीय जरनैली शिड़क प्राधिकरण एनएचएआई दे प्रोजेक्ट डरैक्टर गी निर्देश दित्ता जे सब्बने चौकें ते सड़कें गी सजाने सोआरने दा कम्म 29 जून कोला पैहले पैहले मुकम्मल करी लैता जा।

एह्दे अलावा सरबंधत होरने अजेंसिएं गी बी निर्देश दित्ते गे जे ओ उनें सब्बने थाहरें जित्थें ल्हास पस्सियां पौने दी शेंका मती बनी दी रौंहदी ऐ, उत्थें मशीन ते अमले गी सुददी गिनतरी च तैनात रखेआ जा, तां जे पस्सी-कुप्पड़ पौने दी सूरतै च तुरत मलबा हटाइयै रस्ता साफ करी दित्ता जा तां जे यात्रा दरान उत्थें गडिडएं दा जाम नेई लग्गै। इस मौके उधमपुर दे एसएसपी जोगिन्दर सिंह, एडीसी जोगिंदर सिंह जस्रोटिया, एआरटीओ जुगल शर्मा ते सरबंधत होर दुए मैहकमे दे अफसर बी मजूद हे।

<><><><><><>

LOC Arrest

फौज नै कल पुंछ जिले च नियंत्रण रेखा कश शक्क शुबे आले हालात च इद्दर-उद्दर चक्कर ला'रदे इक आदमी गी हिरासतै च लेई लैता ऐ। अधिकारिक जानकारी मूजब खाकी पैंट ते फौजी वर्दी आंगर दी कमीज ते पैरें चपलियां लाए देइस आदमी गी जिले दे मनकोट सेक्टर च दबराज टॉप इलाके थमां फगड़ेआ गेआ ऐ। दिक्खने ते गल्लबात च एह् आदमी सिद्दड़ जां दमाकी नुक्स आला सेई होंदा ऐ। उआं ओपचारिक पुच्छ गिच्छ लेई फौज नै इसी मेंढर पुलस थाने दे हवाले करी दित्ता।

<><><><><><>

T-20 World Cup

आईसीसी टी-20 विश्व कप दे इक सुपर-8 मकाबले च बंगलादेश गी 8 रंजें कन्नै हराइयै अफगानिस्तान सैमी फाइनल च पुज्जी गेआ ऐ। इस जित्त दा मतलब एह् होआ जे 2021 च आईसीसी टी-20 दा खताब जित्तने आला पिछले मैचें च भारत ते अफगानिस्तान कोला हारेआ, ओ गले दौर च शामिल होने कोला रेही गेआ ऐ। आईसीसी टी-20 विश्व कप दे इक सुपर-8 मकाबले च कल संजा सेंट लूसिया च भारत नै आस्ट्रेलिया गी 24 रंज कन्नै हराइयै प्रतियोगिता दे सैमीफाइनल च प्रवेश करी लैता ऐ। आस्ट्रेलिया नै टॉस जित्तिथै भारत गी पैहले बल्लेबाजी करने लेई आखेआ। भारत नै 20एं ओवरें च 5एं विकटें दे नुक्सान पर 205 रंज बनाए। जित्त लेई लोडचदे 206 रंज दे लक्ष्य दा पिच्छा करदे होई आस्ट्रेलिया पूरे 20 ओवर खेडिडयै बी 7एं विकटें दे नुक्सान पर 181 रंज गै बनाई सकी। भारतीय कप्तान रोहित शर्मा जिन्नै 41 गेंदें च 92 रंज बनाए, गी प्लेयर ऑफ द मैच घोषत कीता गेआ। आस्ट्रेलिया दी तरफा ट्रैविस नै 43 गेंदें च 76 रंज दा योगदान दित्ता। भारत दा अगला मकाबला

वीरवारें मजूदा चेंपियनप इंग्लैंड कन्नै होग। तोआई दक्खन अफ्रीका बी पैहले गै सैमीफाइनल पुज्जी गेदा ऐ।

